

**LEKSYON 5**

**BAG-ONG KABUHI —  
BAG-ONG MGA BULOHATON**



**Ang Matun-an Mo Sa Sini Nga Leksyon**

**Paano ang Paggamit Mo sang Imo  
Tinion?**

**Kon Magbalhin ang Imo Huyog**

**Ang Bag-o Mong Huyog**

**Ang Pagtambong sa Panimbahon**

**Ang Pagbasa sang Biblia**

**Pangamuyo: San-o Dapat Mag-  
pangamuyo**

**Pangamuyo: Paano ang Pagpangamuyo**

**Ang Pagpamatuod**

**Ang Pag-amba sa Ginuo**

**Ang Pagbantala sang Maayong Balita**

**Ang Paghatag**

**Ang Pagbulig sa Bisan ano nga Paagi  
nga Imo Masarangan**

**Ang Pagpakigbahin sa Organisasyon  
sang Iglesia**

**Madamo bala ang mga Bulohaton?**

**Paano ang Paggamit Mo sang Imo Tinion**

Nagakinahanglan ikaw sang tinion tagsa ka adlaw sa pagtrabaho, sa pagkaon, kag sa pagtulog apang paano ang paggamit mo sang iban nimo nga mga tinion? Kon ano ang ginahimo sang isa ka tawo sa tion nga hilway sia, nagapakita man kon ano ang huyog niya kag sang iya panimalay. Ang iban nagatrabaho sa tanan nga tion, kag ang iban nagalingawlingaw lamang. Ang iban nagakadto sa simbahan kag nagapakigbahin sa bulohaton sini; ang iban “wala sing tinion para sa sina nga butang”.

Seguro wala ikaw sang nagakaigo nga panahon sa paghimo sang tanan nga gusto nimo nga himuon. Apang mahimo nimo hatagan sang tion ang mga bagay nga gusto gid nimo buhaton.

**Buhata Ini**

1. Ang imo bulohaton sa hilway nga tinion madali nga mahibaloan paagi sa
  - ..... a) imo mga huyog.
  - ..... b) hambal sang iban.
  - ..... k) luyag sang imo ginikanan.

Sabat: 1. a) imo mga huyog.

## Ang Bag-o Mong Huyog

Wala na ikaw karon nagahampang sang mga hampanganan nga naluyagan mo sang bata pa ikaw bangod kay masako na ikaw sa paghimo sang mga butang nga nagustohan mo. Kon magbalhin ang imo huyog, magabalhin man ang imo mga bulohaton.

Mahimo nga matingala ang mga abyan nimo nga wala na ikaw sing huyog sa “pagpangalipay” kaupod nila sa mga butang nga makahalit sang imo lawas ukon makasamad sang imo kalag. Indi nila mahangpan nga nagsulod na ikaw sa pagkabuhi nga may bugana pa nga kalipayan, nga napun-an sang mapuslanon nga tion kag may makalilingaw nga bulohaton.

Magabalik pa bala ikaw sa mga butang nga nahibaloan mo nga indi makahatag sing kaayawan? Pamangkota ang isa ka tawo nga nagakaon sang pan-os nga kan-on gikan sa basurahan kag pagkatapos gin-agda sang manggaranon niya nga abyan nga magkaon adlaw-adlaw upod sa iya kon bala mabalik pa sia sa pagkaon sa basurahan.

### Buhata Ini

2. Nagbalhin bala ang imo mga huyog sumogod sang ginbaton mo si Ginuong Jesus nga imo Manluluwas?....  
.....
3. Nagbalhin bala ang imo mga bulohaton? .....

### Ang Bag-o Mong Huyog

Bilang anak sang Dios may bag-o na ikaw nga mga huyog. Amo ini ang nagatuytoy sa imo sa mga bulohaton sang iglesia kag sa kaugalingon nga mga katungdanan. Magabuhat pa ikaw sang mga bagay nga ginahimo mo sa kinaandan katulad sang pagtrabaho, pagkaon, pagtulog kag pagtatap sang bulohaton sa sulod sang balay. Apang ang matuodtuod mo nga pagkabuhi masentro sa bag-o mo nga huyog.

Labaw sa tanan, kon nagahigugma ikaw sa isa ka tawo, buot ka nga mag-upod sa iya kag buot mo nga lipayon sia. Subong karon nga ginahigugma mo ang Dios, buot ka maghatag sang imo mga tinion sa Iya kag buot mo man nga lipayon Sia sa tanan nga ginabuhat mo.

#### Buhata Ini

4. Ang malahalon nga huyog sang anak sang Dios amo

- .... a) ang pagtinguha sa pag-angkon sang kuwarta.
- .... b) ang paglipay sang iya kaugalingon.
- .... k) ang pagpakig-upod sa iya Langitnon nga Amay kag sa pagbuhat sang mga butang nga makapahamuot sa Iya.

Sabat: 4. k) ang pagpakig-upod sa iya Langitnon nga Amay kag sa pagbuhat sang mga butang nga makapahamuot sa Iya.

Daku gid ang aton handum sa pagpakig-ambit sang Ginharian sang aton Amay nga igapasad diri sa duta. May bulohaton Sia para sa tagsa-tagsa sa aton. Tanan kita nagahanda sa pag-abot ni Ginuonng Jesus agud nga maghari sa tanan nga pungsod sa pagkamatarung kag sa paghidait.

### **Buhata Ini**

5. Ano ang imo balatyagon karon nga nahibaloan mo nga ang Dios nagapaabot sang imo bulig sa paghanda sang mga butang para sa Iya pag-abot?
  - .... a) nagakalipay sa pag-angkon si-nang dungog kag kahigayunan.
  - .... b) nagakasubo kay may bulohaton para sa Dios.
6. Kon ang imo sabat sa pamangkot 5 amo ang "a)" pasalamatang ang Dios sa kahigayunan nga makapakigbahin ikaw sa Iya bulohaton kag Ginharian. Kon ang imo sabat amo ang "b)" ginapangabay ko nga pangamuyoan mo ini.

Ang bag-o mo nga handum sa ginharian sang Dios magahimo sa imo nga masako kag malipayon. Yari ang mga bulohaton nga magahatag sa imo sing bag-ong tinutoyo kag kahulogan sa imo kabuhi.



### **Ang Pagtambong sa Panimbahon**

Ang panimalay sang Dios mga organisado nga mga iglesia. Ang mga Kristohanon sa tagsa ka duog nagatipon sing masunson sa pagsimba sa Ginuo, nagabulig sa isa kag isa sa espirituhanon nga pagtubo, kag nagabuyloganay sa bulohaton nga ginhatag sang Dios sa ila.

Ining pagtililipon ukon panimbahon, mahimo nga hiwaton sa balay lamang sang isa ka utod sa Ginuo, ukon sa pinatindog nga simbahan. Maluyag ikaw sa pagtambong sang mga panimbahon sa tanan nga tion, kag sa pagpanghagad sang imo mga abyan sa pagpamati sang Pulong sang Ginuo. May kalipay ikaw sa imo pagpakig-hiusa sa mga kautoran nimo sa Ginuo. Kag labi sa tanan ang himaya sang Ginuo imo mabatya-gan sa sini nga panimbahon.

Sa indi madugay, gusto mo nga magmangin katapo sang isa ka iglesia nga nagaalagad sa Dios kag nagawali sang Maayong Balita. Magpakigbahin ikaw sa ila nga bulohaton, kag magakalipay sa kahigayunan kag pagpakamaayo nga imo mabaton. Ini nga tulon-an makabulig agud magmangin maayo ikaw nga katapo.

#### **Buhata Ini**

7. Kon gusto mo nga gamiton ikaw sang Ginuo sa Iya bulohaton kag magkalipay sa pagpakamaayo sang Kristohanon nga paghiliusa kinahanglan

- .... a) magpalayo ikaw sa iglesia.
- .... b) magtambong ikaw sa iglesia apang indi lang magmangin katapo.
- .... k) magmangin katapo sang maayo nga iglesia kag magpakigbahin sa bulohaton.

Ano ayhan ang mahanabo kon sa pila ka adlaw ang pastor, ukon ang iban nga mga Kristohanon makapasandad sa imo nga wala ginatuyo paagi sa ila mga pulong? Sa sulod sang panimalay, kon ang kabataan mag-ilinaway, wala ini sila nagapalaxyo palayo sa ila nga balay. Apang kon magkalatabo gani ini sa iglesia, ang iban nga mga Kristohanon nagasiling; “Nasandad ako sa iya. Indi na ako magbalik sa simbahan. Masimba na lang ako sa Ginuo sa amon balay.” Magandam! Kay amo ini ang paborito nga lalang sang panulay sa pagpaluya sang mga Kristohanon, kag sa pagpalayo sa ila sa Ginuo.

Dumdoma nga nagapaabot ang imo Amay nga ang Iya mga anak magtililipon sa Iya balay. Ayhan indi matahom ang simbahan. Ayhan wala ikaw maanad sa ila panimbahon, apang kinahanglanon gid nga makapakighiusa ikaw sa mga kautoran mo sa Ginuo sa latok kalan-an sang imo Amay, sa pagpakig-ambit sang pagkaon nga kinahanglanon sang imo kalag.

Nga wala nagabiya sang aton pagtililipon sing tingub, subong sang kinabatasan sang iban, kundi maglinaygayay ang isa kag isa. Mga Hebreo 10:25

### **Buhata Ini**

8. Kon may ginhambal ang pastor nga makapasandad sa imo, ang imo himuon amo ang

- .... a) mag-untat sa pagkadto sa simbahan.
- .... b) magkuha sang lain nga pastor.
- .... k) magpatawad sa iya kag magpadayon sa pagtambong sa mga panimbahon.

9. Sauloha ang Mga Hebreo 10:25.

Sabat. 8. k) magpatawad sa iya kag magpadayon sa pagtambong sa mga panimbahon.

### **Ang Pagbasa sang Biblia**

Nahambalan na naton ang pagkamalahalon sang pagbasa sang Biblia adlaw-adlaw. Nagabuylog bala sa imo ang imo panimalay sa pagbasa sang Biblia kag sa pagpangamuyo? Ginatawag ini nga pagpangamuyo sang bilog nga panimalay, ukon "family altar". Daku nga pagpakamaayo ini sa imo panimalay. Magapabakod kag nagatuytoy ang Pulong sang Ginuo sa sina nga adlaw. Sa pagpangamuyo sang bilog nga panimalay, nagabuylog ang isa kag isa sa pagpangamuyo sa



mga problema kag kinahanglanon sang tagsa ka katapo sang panimalay.

### Buhata Ini

10. Ang Kahulogan sang pagpangamuyo sang bilog nga panimalay ukon “family altar” amo ang

- .... a) panimbahon sa iglesia nga ginatambongan sang isa lamang ka panimalay.
- .... b) pagbuyloganay sang tanan nga katapo sang panimalay sa pagpangamuyo kag sa pagbasa sang Biblia sa ila balay.

Sabat: 10. b) pagbuyloganay sang tanan nga katapo sang panimalay sa pagpangamuyo kag sa pagbasa sang Biblia sa ila balay.

### Pangamuyo: San-o Dapat Magpangamuyo

Isa ka labing malahalón nga bagay nga pagahimuon sang Kristohanon amo ang pagpangamuyo. Kon magpangamuyo ikaw kag ginasabat sang Ginuo, nagapangabudlay ikaw kaupod sang Dios. Busa hatagi sang tion ang pagpangamuyo.

▲ Sa pagbugtaw mo sa kaagahon, sugori ang adlaw nga kaupod nimo ang Dios kag mabaton mo ang lawason, moral, kag espirituhanon nga kusog sa pag-atubang sang mga problema sa sina nga adlaw. —

▲ Maghiwat sang pagpangamuyo sang bilog nga panimalay sa aga ukon sa gab-i. —

▲ Maghingalit sa pagpangamuyo sa wala pa makasugod ang panimbahon kag sa tion sang pagpangamuyo sa iglesia. Kay ang Dios nagsiling, “Ang akon balay tawgon nga balay nga palangamuyoan”. —

▲ Ibayaw ang imo tagipusoon sa Ginuo sa bisan ano lang nga tion sa pagpasalamat sang pagpakamaayo, ukon sa pagpangayo sang bulig. Indi kinahanglan sa sini nga tion nga ibungat gid nimo ang imo pangamuyo kay ang Amay naka-hibalo sang imo paghunahuna. —

▲ Pasalamat ang Dios sa wala pa magtulog sa gab-i tungod sang Iya pagtatap sa imo sa sina nga adlaw. Magpangayo sing kapatawaran sa Iya bangod sa mga sala nga imo nahimo. Kag isalig ang imo kaugalingon sa Iya pagbantay sa kagabihon.

### **Buhata Ini**

11. Ibutang ang marka nga ini (✓) sa tupad sang mga tion sang pagpangamuyo nga imo na nahimo.

### **Pangamuyo: Paano ang Pagpangamuyo**

Ayhan nagasiling ikaw sa imo kaugalingon: “Indi ako makahibalo magpangamuyo”. Indi ini mabudlay. Magpakighambal sa Dios subong sang nagahambal ikaw sa imo abyan. Magabulig ang Balaan nga Espiritu sa imo.

Panumdoma ang tanan nga ginhimo sang Dios sa imo, kag pasalamat si Sia sang Iya bugay. Magpangayo ikaw sang imo kinahanglanon sa Iya. Subong man ang kinahanglanon sang imo mga hinigugma. Magpangamuyo ka para sa kaluwasan sang imo abyan kag himata. Pangamuyoi man ang imo pastor, ang iglesia, mga utod sa Ginuo kag ang bulohaton sang Dios sa bug-os nga kalibutan. Pangamuyoi ang bag-o nakabaton sang aton Manluluwas kag ang ila mga palaligban. Pangamuyoi ang imo dutang natawohan. Sugori lang ang pagpangamuyo kay sa indi madugay makahibalo gid ikaw kon paano ang pagpangamuyo.

Naghatag si Ginuong Jesus sang sulondan sa pagpangamuyo. Mahimo nga saulohon mo ini kag gamiton sa imo pagpangamuyo.

### **Pangamuyo Sang Ginuo**

Amay namon nga yara sa langit, Pakabalanan ang imo ngalan. Magkari ang imo ginharian. Paghimuon ang imo kabubot-on, sa duta subong sang sa langit. Hatagi kami karon nga adlaw sang amon kalan-on sa adlaw-adlaw; kag patawara kami sang utang namon; subong nga ginpatawad man namon ang mga nakautang sa amon; kag dili kami pagdalha sa panulay, kundi luwasa kami sa malaut. Kay imo ang ginharian kag ang kagamhanan kag ang himaya sa walay katubtoban. Kabay pa. Mateo 6:9-13.

### **Buhata Ini**

12. Sauloha ang pangamuyo sang Ginuo.

## Ang Pagpamatuod

Nagakahulogan ini sang pagsugid sa iban nga mga katawohan kon ano ang ginbuhat sang Dios sa imo. Mahimo nimo ini sa inyo nga balay, sa dalan, sa panimbahon ukon paagi sa sulat.

Subong nga ginsugiran ka sang iban nahanungod kay Kristo, magpanugid ka man sa imo mga abyan kag mga himata. Pangamuyoi nga batunon nila ang Ginuo agud nga indi sila magkadto sa impiyerno.

Ang Biblia nagasiling nga kinahanglan gid nga ipabutyag naton sa hayag ang aton pagtuo kay Kristo, sa pagpahibalo sa iban nga si Kristo ang aton Manluluwas. Nagsiling si Kristo, "Mga saksi ko kamo". Kon nagakinahanglan ikaw sing kaisog sa pagpamatuod, pangayoa ini sa Dios kay hatagan Niya ikaw sang imo ginapangayo. Linibo nga mga katawohan ang nagakahadlok sa pagpamatuod katulad sang ginabatyag mo karon, apang nadaug nila ang ila kahadlok kag nakita nila ang daku nga pagpakamaayo kag bag-ong kusog paagi sa pagpamatuod para kay Kristo. Si Ginuong Jesus nagsiling:

**B**usa ang tagsatagsa nga magtuad sa akon sa atubangan sang mga tawo, ituad ko man sia sa atubangan sang akon Amay nga yara sa langit. Mateo 10:32.

**K**ay ang bisan sin-o nga nagakahuya sa akon kag sa akon pulong. . .ang Anak sang tawo magakahuya man sa iya kon magkari sia sa himaya sang iya Amay upod sang balaan nga manugtunda. Marcos 8:38.



### Buhata Ini

13. Buot sang Dios nga ang Iya mga kaanak

.... a) maghipos lamang nahanungod sa ginbuhat Niya sa ila.

.... b) magsugid sa iban kon ano ang Iya ginbuhat sa ila.

Sabat: 13. b) magsugid sa iban kon ano ang Iya ginbuhat sa ila.

### Ang Pag-amba sa Ginuo

Ang mga ambahanon mo sa balay ukon sa iglesia magabulig, magapabakod kag magapaka-maayo sa imo kag sa iban. Bisan indi maayo ang imo tingog sa pag-amba, ang labing importante lamang amo ang imo pagdayaw sa Dios nga naganagan sa imo tagipusoon.

Kag may mga salmo kag mga ambahanon kag mga kalantahon nga espirituhanon sa pagpasalamat sa Dios sa inyo mga tagipusoon. Mga Taga Colosas 3:16

### Buhata Ini

14. Ang labing importante nga bagay sa pagkanta amo nga

.... a) may maayo nga tingog ang nagakanta.

.... b) nagakanta sia sa simbahan.

.... k) kinahanglan magkanta sia gikan sa iya tagipusoon kag sa kahimayaan sang Dios.

Sabat: 14. k) kinahanglan magkanta sia gikan sa iya tagipusoon kag sa kahimayaan sang Dios.



**Ang Pagwali sang Maayong Balita**

Isa ini sa labing importante nga bulohaton sang iglesia. May iban nga ginatawag sa pagbug-os sang ila tion sa pag-alagad sa Dios. Naghatag ang Dios sa ila sang katungdanan bilang mga pastor, mga ebanghelista, kag mga misyonero.

**Ang Paghatag**

Subong nga ang pagwali sang Maayong Balita bulohaton sang bug-os nga panimalay sang Dios, ginapangayo man sang Amay sa tagsatagsa Niya ka mga anak ang maghatag sang ikapulo nga bahin sang ila kinitaan sa pagbulig sa mga galastuhan. Ginagamit ini nga kuwarta sa pagbayad sang hinakay sang duog nga ginsimbahan, sa pagsakdag sa pastor agud nga mabug-os niya ang iya tinion sa bulohaton sang Dios kag sa pagbayad sang suga, tubig kag iban pa nga galastuhan sang iglesia. Magabulig man ang aton mga dulot sa pagbantala sang Maayong Balita paagi sa radyo, balasahon, kurso sa Biblia paagi sa koreo kag sa bulohaton sang Dios sa iban nga duog sang kalibutan.

**Buhata Ini**

15. Ang paghatag sang ikapulo amo

- .... a) ang paghatag sang ikanapulo nga bahin sang imo kinitaan sa Dios.
- .... b) ang paghatag sang ikanapulo nga bahin sang tanan mo nga pagkabutang sa Dios.
- .... k) ang paghatag sang ikaapat nga bahin sang imo kinitaan sa Dios

Sabat: 15. a) ang paghatag sang ikanapulo nga bahin sang imo kinitaan sa Dios.

Ang imo mga ikapulo kag mga dulot bahin sang imo pagsimba sa Dios. Amo ini ang paagi sang “pagpasalamat” mo sa tanan Niya nga pagpakamaayo. Nagahimo ini sa imo nga kaupod sang Dios sa daku nga bulohaton sang pagpalapnag sang Maayong Balita sa bug-os nga kalibutan.

Naghatag ang Dios sa imo sang kusog sa pagtrabaho, gani ihatag mo sa Iya ang ikanapulo nga bahin sang imo nga kinitaan. Magabulig ina sa iglesia agud nga magpabilin nga bukas ang ganhaan sa pagwali sang Maayong Balita. Gani paagi sa imo ikapulo nagawali ikaw sang Maayong Balita.

Ang paghatag mo sang ikapulo nagahatag sa imo sang tatlo ka sari sang mga pagpakamaayo.

▲ Espirituhanon nga pagpakamaayo.

▲ Kaayawan. May kalipay ikaw nga magmangin kasaligan nga katapo sa panimalay sang Dios nga nagapas-an sang imo bahin sa palas-anon.

▲ Kabuganaan. Indi mo malabawan sing hatag ang Dios. Ginapabugana Niya ang mga nagabayad sang ila ikapulo. Makasugid sa imo ang linibo nga mga Kristohanon sang ila inagihan sa sini nga bagay nga matuod ini.

Dalha ninyo ang bug-os nga ikapulo sa balay sang bahandi, agud may kalan-on sa akon balay; kag tilawi ako karon sa sini, nagasiling ang Ginuo sang mga kasoldadosan, kon indi ko pagbuksan sa inyo ang mga talambuan sang langit kag iula sa inyo ang pagpakamaayo sa bagay nga wala na sing masudlan. Malaquias 3:10.

Kay ang Dios nagahigugma sa manughatag nga malipayon. 2 Mga Taga Corinto 9:7.

### Buhata Ini

16. Nagsaad ang Dios sa pagpabugana sa mga

.... a) nagatago sang tagsa ka senintimos nga ila makita.

.... b) nagabayad sang ila ikapulo.

Sabat: 16. b) nagabayad sang ila ikapulo.

### Ang Pagbulig sa Bisan ano nga Paagi nga Imo Masarangan

Bisan ano lang nga trabaho ang imo ginahimo para sa Ginuo magabulig ina sa imo pagtubo nga espirituhanon: gikan sa pagpanilhig sa simbahan tubtob sa paghiwat sang panimbahon sa imo mga kaiping ukon sa paghiwat sang klase para sa mga bata sa imo puloy-an. Pamangkuta ang imo pastor kon ano ang imo mahimo para sa Ginuo.

### **Buhata Ini**

#### **18. Kinahanglan ang Kristohanon**

- .... a) magtanyag sang iya bulig sa pastor sa bisan ano lang nga paagi nga iya masarangan.
- .... b) maghulat lang sa pangabay sang pastor.

Sabat: 18. a) magtanyag sang iya bulig sa pastor sa bisan ano nga paagi nga iya masarangan.

### **Ang Pagpakigbahin sa Organisasyon sang Iglesia**

Ang iglesia may madamo nga mga organisasyon. Ang klase sa adlaw nga Domingo para sa tanan. Magtambong sa isa ka klase kag magtuon sang Pulong sang Dios sing maid-id. Indi paglika-wi ini nga kahigayunan. Ang mga lalaki, babayi, pamatan-on kag mga kabataan may kaugalingon nga organisasyon. Sa ila mga pagtililipon naga-simba sila sa Ginuo kag nagahimo sang mga proyekto para sa Dios. Magpakigbahin sa isa sining mga guban. Mabaton mo ang mainit nga pag-abiabi kag malipay ka sa mga bulohaton. Ini nga mga guban nagapaninguha sa pagpaalinton, sa pagtudlo, kag sa pagbulig sa nagakinahanglan sang Pulong sang Dios. Bisan diutay lamang ang mahimo sang isa ka tawo apang kon ang Dios magpanghikot sa ila pagbuyloganay, makabuhat sila sing daku sa pagpalapnag sang ngalan sang Dios sa kalibutan.

**Buhata Ini**

19. Katapo bala ikaw sang isa ka organisasyon sa iglesia? . . . . . Kon indi pa, buot mo bala nga magmangin katapo? . . . . . Sa ano nga grupo? . . . . .

**Madamo Bala ang mga Bulohaton?**

Indi lang ikaw magkabalaka kon indi ikaw makahatag sing madamo nga tion sa tanan nga mga bulohaton, kasubong sang iban. Nakahangop ang Ginuo sini kag pagabuligan Niya ikaw sa paghimo sang imo masarangan.

Malipay ikaw sa sining mga bulohaton sang bag-o mo nga kabuhi. Malipay man ikaw sa paghibalo nga nagabulig ikaw sa iban nga tawo sa paglikaw sa silot nga walay katapusan kag sa pagpangita sang kabuhi nga walay katubtoban. Kag sa tanan nga ginabuhat mo para sa Ginuo karon, pagapadyaan ikaw sa palaabuton.





## PAGPAKILALA sang LEKSYON 6

Ang Leksyon 6 sang “Ang Bag-o Mo Nga Kabuhi” nga kurso sa Biblia ginatig-ulohan, “ANG BAG-O MO NGA MGA PAGESULONDAN”. Ini nga pagtuon sa Biblia magabulig sa imo sa pagtukib sang ginapaabot sang Dios sa imo kag kon paano ikaw makatuman sinang mga pagsulondan.

Wala sing bisan sin-o man kundi ang Dios lamang ang makahatag sang husto nga mga pagsulondan para sa pagkabuhi sang isa ka tawo. Ang kadamoan sang mga tawo karon nga mga inadlaw, nagakabuhi suno sa nagabalhinbalhin nga pagsulondan sang tawo.

Ang Leksyon 6 magabulig sa imo sa paghibalo kon ano ang matuodtuod nga pagsulondan Kristohanon kag kon paano makatuman sini.